



Jumat, 02 September 2022
Ogen: Esekiel 48:1-7;23-29



"Lit Balengna"



Tanah Kanaan eme tanah perpadanen Dibata si iberekenNa man bangsa Israel. Tupung bangsa e bengket dengen ngiani tanah perpadanen si dem alu susu ras madu ialoken bangsa e kai si ipadanken Dibata. Sepuluh dua suku i bas bangsa Israel ngaloken tanah perpadanen. Belangna tanah si ibereken Dibata tentuna la simetris entahpe la persegiempat dengen tingkat kesuburen bage pe kualitas tanah ras kandungan si lit i bas tanah e pe la bali. Buena suku-suku sepuluhdua tambah kalak asing si ikut mengketi tanah perpadanen e; tentu la mesukah lako mbagiken tanah rikut pe ras balengna. Josua si jadi pemimpin si mabai bangsa e ndatken kepentaren si rehna ibas Dibata nari guna erbahan baleng pembagin tanah man teptep suku bage pe man kalak sideban. Josua arah kepentaren siibereken Dibata mbagiken ras erbahan baleng ibas pembagin tanah e rikut ras kualitas bage pe kandungan teptep tanah. Erkiteken pembagin baleng e jelas dengen adil maka sada suku pe la lit si jungut-jungut. Kerinana sikap ras payo, tertata seh maka lalit simuat bagin sikerajangen suku sideban. Alu kata sideban la lit singgeseren baleng.

Kalak karo pada umumna pe ngaloken tanah sebagai erta warisen arah orangtuana, tapi megati tading-tadingen tanah e mabai persoalen dengen mpeturah perubaten erkiteken la siangkan ersenina ras erturang erkiteken baleng si la jelas ras la rikutken oratna. Kejelasan ibas pembagin erta bage pe kejelasan baleng tanah jadi hal si penting gelah ula lit persoalen ku pudi wari.

Perlu kel kita ercurmin dengen erlajar arah cara Josua erbahan baleng man teptep suku. Josua erbahan baleng alu ngenen ku bas kandungan tanah, letak geografis bage pe kualitas tanah seh maka lalit suku-suku Israel ras kalak si deban keberaten. Teptep suku ngalokenca keputusan si ibahan Josua alu keriahen ukur erkiteken kerina tanah lit balengna.